



COMUNE DI BORDANO

Provincia di Udine

Medaglia d'oro al merito civile

COMUN DI BORDAN

Provincia di Udine

Medaie di aur al merit civîl

AVÏS PES FAMEIS CUN FÏS A CARIC

Inzornât a Otubar dal 2013

LA CJARTE FAMEE REGJONÂL

La Cjarte Famee e je un strument par sostignî lis fameis cun fîs a caric.

La Cjarte e je dade fûr dal Comun ai nuclis familiârs cun almancul un fi a caric, e li che almancul un dai gjenitôrs al sedi resident tal teritori regjonâl di almancul 24 mêis.

Daûr dal numar di fîs a caric, e ven assegnade la fasse di intensitât dal benefici (basse a cui che al à un sôl fi, medie a cui che a 'nd à doi, alte a cui che a 'nd à trê o plui).

La fasse di apartignince e determine la misure de agevolazion: plui grant al è il numar dai fîs, plui grant al sarà ancje il benefici.

La Cjarte e à une scjadince e si à di rinovâle in maniere periodiche. La sô validitât e je leade a chê de atestazion I.S.E.E.

Atenzion! L'ISEE dal nucli familiâr nol corispuint dome ae semplice sume dai redits Irpef, ma al ven calculât in maniere diferente e tignint cont dal numar dai components dal nucli familiâr. I Centris di Assistance Fiscâl (CAF), o altris struturis delegadis a emeti l'ISEE, a puedin jessi utii par capî la proprie pussibilitât di acès ae Cjarte Famee e cuâi documents che a son necessaris pe elaborazion.

Cui che al à dirit

A àn dirit lis fameis cun chescj requisîts:

- al à di fâ part de famee almancul un fi a caric;

cun fi a caric si intint il fi fiscalmentri a caric. A norme di leç, i fîs a son considerâts fiscalmentri a caric se, indipendentmentri de lôr età, tal an precedent no àn vût redits che a concorin ae formazion dal redit complessîf par un valôr superiôr a 2.840,51 euros, al sporc des vôs defalcabilis (test unic impuestis sui redits -DPR n. 917/1986, articul 12, come 3);

- il nucli familiâr al à di vê un ISEE in cors di validitât che nol passi i 30.000 euros;

- almancul un dai gjenitôrs al à di jessi resident tal teritori regjonâl di almancul 24 mêis (cemût che al è previodût de L.R. dai 30 di Novembar dal 2011, n.16);

Cemût otignîle

La **domande** de Cjarte Famee e à di jessi presentade in cualsisei moment dal an al Comun di residence.

La domande e pues jessi presentade di:

- un dai gjenitôrs;

- il gjenitôr separât o divorziât che al à cure de ordenarie gjestion dal fi a caric e che al convîf cun lui;

- un dai gjenitôrs adotîfs o afidataris, fin dal moment che si invie l'afidament preadotîf;

- la persone singule o un dai coniugâts des fameis afidataris di minôr, su la fonde de leç dai 4 di Mai dal 1983, n. 184 (Dirit dal minôr a une famee).

Cui che al presente la domande al à di jessi resident in Friûl Vignesie Julie tal moment de presentazion.

Par presentâ la domande, si à di compilâ un model (disponibil tal Uffici demografic) li che si à di declarâ di vê la atestazion ISEE dal propri nucli familiâr in cors di validitât e, eventualmentri, si à di presentâ i documents domandâts di volte in volte pe ativazion dai singui beneficiis.

Il Comun al verifich la sussistence dai requisîts di acès, al proviôt a inserî i dâts tal sisteme e al da fûr une atestazion (identificatîf di Cjarte Famee) che si à di conservâ.

La Cjarte Famee e scjât il trentesim di dopo la scjadince de atestazion ISEE che si à in man e che e je stade declarade in fase di domande. Par rinovâle, si à di fâsi fâ une gnove atestazion ISEE e declarâ il so possès al Comun.

ATENZION: Il titolâr al è tignût a visâ dal moment il Comun tal câs di robarie, distruzion o pierdite dal identificatîf, come pûr di trasferiment de residence fûr regjon o intun altri comun de regjon.

La Cjarte Famee e pues jessi revocade tal câs di violacions de normative leade al so ûs.

L'Uffici demografic al riserve a chestis praticis chescj **dîs e oraris**: il lunis dopomisdî des 17.30 aes 18.30 e il miercus a buinore des 11.00 aes 13.00; altris dîs e oraris si àn di concuardâ ai numars 0432.988049/988120 (Lorella Colomba o Carla Picco).